

殺虎口監督署報告書

殺虎口監督署報告書卷六

關於呈咨移會文件

呈覆財政部辦理陽高薩拉齊河曲各縣抗稅情形文

爲呈覆事中華民國元年八月十二日奉鈞部令開本年七月間據署殺虎口監督文瀾將薩拉齊縣知事自治會所長陽高縣等處阻撓稅務情形先後呈報前來查各處商民阻撓稅務自應嚴行查禁而各關卡徵收稅項往往過於苛細亦非政體所宜應如何安定章程俾稅務人情兩無妨碍之處相應抄錄原呈劄飭殺虎口監督查明辦理並申覆本部察核可也此令等因奉此監督於八月間蒞任時道經陽高縣派得勝口分局主任員前直隸州知州帥培英與陽高縣知事及該地方紳董妥爲接洽並密查該稅局員司有無苛徵情事該主任員當卽馳赴小村秘密調查苛徵一節全屬子虛及與陽高縣知事並紳董武繼祖等晤面該紳董頗有訾議該縣知事並未反對但以十五村稟請移設稅局爲詞經該主任員曉以大義反覆譬喻平和磋商該縣知事

及紳董等始無異議稅局仍駐小村移局之議遂罷嗣經小村分局主任員湖北方言學堂卒業生陶春榮請於鎮門安設分卡藉防偷漏會同該縣知事出示曉諭地方商民仍舊照章納稅彼此相安無復抵抗之事此辦理陽高縣交涉之實在情形也監督抵任之後詢及西包頭稅局情形乃知薩拉齊縣商民及該縣自治會實有抗稅之舉查該局祇收牲畜稅牲畜稅分爲二種一爲通常牲畜稅如販運牲畜照章徵稅者是

一爲年期牲畜稅如騎駛拉車之牛馬駝隻每年徵稅換票一次者是歷經辦理在案自去年軍興商民羣起反抗該縣自治會阻撓尤力而五原縣自治會繼之年期牲畜稅一概不准徵收該二縣知事唯唯否否不負責任以故收數短絀不敷局用經監督委派湖北省師範學堂卒業生魯靖氛爲該局主任員與薩拉齊五原兩縣官紳妥爲接洽復咨請山西都督民政長頒行告示飭薩拉齊五原兩縣知事張貼局門反抗風潮漸就平息或不致再有推波助瀾之事此辦理薩拉齊五原兩縣交涉之實在情形也此外本關所屬河保營黃甫川兩稅局一設在山西河曲縣一設在陝西府谷縣去

年軍興暫行停辦監督到任有整頓稅務之責擬續籌開辦俾復舊觀特派委員前貴州知縣唐之春先馳往河曲縣與該官紳接洽開辦河保營稅局地方官紳頗以都督民政長未有示諭爲詞不無遲疑觀望而地方莠民遂不免有抵抗情事唐委員因辦事棘手再三請假不俟批示翩然逕去經監督繼派湖北方言學堂卒業生前黑龍江通判楊洪祖爲河保營稅局主任員與河曲官紳極力協商復一面咨請山西都督民政長行知河曲縣知事明白示諭並轉飭警務長隨時派警彈壓民政長復頒行告示曉諭人民現在業經照常徵收並無反抗之舉此續籌開辦河保營稅局之實在情形也至黃甫川稅局在陝西府谷縣境內業已咨請陝西都督行知府谷縣知事維持一切一俟陝西都督咨覆到日再行派員舉辦除本關稅則關係重要俟釐訂就緒再行呈請核定外所有辦理陽高薩拉齊抗稅交涉及開辦河保營稅局各情形理合呈覆總長鑒核藉抒臚臚系謹呈

中華民國元年十月五日

呈財政部請明定監督公費以憑列入預算文

爲呈請事十月十七日奉鈞部令開案查民國元年九月至十二月四個月臨時預算已由本部編齊提交參議院議決在案又查會計法草案現已提出交議一經議決卽當實行本部職司會計亟應先爲準備以免臨事周章茲查會計法草案內開第一條政府會計年度以每年七月初一日開始次年六月三十日終止此項會計年度本部卽查照此條暫行規定是二年度正式預算應從二年七月初一日爲開始之期所有二年七月以前及元年十二月以後之預算自應早事辦理以爲結束而清界限應令該監督迅速辦理民國二年一月至六月行政經費出入預算冊儘十月三十一日以前送到本部以憑彙編等因奉此查辦理歲出預算以不濫不遺爲原則蓋填列猥濫固顯違預算之旨如力求撙節而有遺漏亦非預算所宜恐要求追加手續徒煩也監督於本年八月底辦理殺虎關民國元年九月至十二月四個月臨時預算並未列監督公費蓋監督公費向例由稅款內提成每年約有銀二萬餘兩監督自到任以來竊

見關務積疲弊竇百出頗思痛除舊習釐剔弊端以期維持權政於萬一然非本身作則深恐成效難期故監督擬將此二萬餘金盡數歸公監督公費擬請鈞部另行規定以此未列入臨時預算本月所擬整頓殺虎關稅務辦法文內亦請取消監督提成銀兩明定公費業經疊次呈明各在案現在復奉鈞部令飭辦理民國二年一月至六月預算冊則監督公費一項似應按月列入不得遺漏致異日有要求追加之煩爲此呈請鈞部將監督每月公費明白規定庶辦理預算不致有遺漏之結果此項預算冊飭於十月三十一日以前呈送到部俟奉到鈞部批示後卽行遵照辦理所有擬請明定監督公費以憑列入預算緣由理合呈請總長鑒核批示遵行再本關辦理民國元年九月至十二月四個月預算監督公費未曾列入究應如何辦理之處請總長一併批示俾便遵循謹呈

中華民國元年十月二十日

十一月十三日奉財政部電殺虎口甘監督鑒儉電悉該監督擬將每年應得提成公

費約兩萬餘金全數歸公監督公費請另行規定等情現值司農仰屋該監督潔已奉公殊堪嘉許所有該監督公費准暫比照現行官俸草案參事最高級十成支給月支四百元其經常臨時支出數目已照來電列入臨時預算在參議院未經議決以前准酌照舊案核實支銷特覆財政部眞印

呈財政部報明按陽歷發給驛傳道馬價文

爲呈報事民國元年十一月二十五日奉鈞部指令內稱本部准蒙藏事務局函稱殺虎口驛傳道應領壬子年九月初一日起至癸丑年八月底止一年四季口外馬價銀除減成扣平外實領庫平銀六百八十三兩九錢九分一厘請部劄令殺虎關監督照例發給等因前來查前項馬價係屬例支之款歷經殺虎口監督照數撥給在案茲准前因相應令知該監督照例發給呈報可也此令等因奉此查本關發給此項馬價從前係按陰歷計算現在改用陽歷計算每年四季每季應發給庫平銀一百七十兩九錢九分七釐七毫五絲民國元年已發至九月底止若續行請領應自民國元年十月

一日起至民國二年九月底止爲一年除民國元年冬季馬價銀兩業已照例發給由殺虎口驛傳道察收外所有改按陽曆發給緣由理合呈報總長鑒核備案謹呈

中華民國元年十二月十二日

呈財政部擬將本關稅款隨時解部文

附部令

爲呈請事案查殺虎關向例所收稅銀均按一年彙解於年滿後三個月內起解此載在前清戶部則例者也現在民國初建財政困難若仍照前清舊例辦理未免緩不濟急監督擬將所收稅款隨時匯解部庫俟會計年度終了之時再行分別已解未解提撥開支各項彙總列表呈報鈞部以爲結束而憑稽核再查政府會計年度以每年七月一日開始次年六月三十日終止所有民國元年九月以後至民國二年六月以前本關預算業經先後編造呈送鈞部查核提交參議院議決在案所有本關出入各款擬請自民國元年八月二十一監督到任之日起截至民國二年六月三十日止爲彙總報部之期勿庸以一年期滿爲限所有擬將本關稅銀隨時呈繳部庫及以民國二

年六月底爲彙總報部期限各緣由是否有當理合呈請總長鑒核批示遵行謹呈

中華民國元年十二月二十四日

財政部指令令殺虎口監督甘鵬雲

據呈稱該關所收稅銀隨時解部又出入各欸擬截至二年六月底止爲彙總報部期限請核示遵行等情前來查所請將收入稅銀隨時解部自係爲接濟要需起見應准如所擬辦理至報部期限一節應自該監督到任之日起截至元年十二月底止將收支各欸先行清結開單報部查核嗣後卽按半年造報一次以便考核合行指令該監督遵照可也此令

呈財政部改徵布稅請備案文

爲改徵布稅呈請備案事竊本關與張家口同以邊牆一帶爲稽徵區域所有稅率自應力謀統一以期人民負擔之均平查張家口稅則每大平機布一疋徵銀二分中平機布一疋徵銀一分四厘本關稅則每中機布一疋祇徵銀五釐較張家口所徵不過

三分之一未免輕重懸殊現經擬定此項布稅每疋改徵正銀一分查中國關稅稅則雖不盡同然大率以值百抽五爲標準此項中平機布價每疋可售銀八九錢今卽改徵一分不但不及百分之二並不及百分之一五可謂輕微已極決不至苦累商民業經自民國二年一月起一律按照一分抽收所有改徵布稅日期理合呈請總長鑒核備案謹呈

中華民國二年二月十一日

呈財政部監督旅費請作正開銷文

爲呈請事竊查向例監督公費於稅款內提成每歲約有二萬餘金故監督到任及回京川資不另支給現經監督呈請取銷提成舊例所有到任及回京旅費擬請作正開銷由陽高至殺虎口一帶山路崎嶇交通不便旅費稍不撙節動需四五百金現經核實估計擬請每次旅費以銀三百兩爲限所擬是否有當理合呈請總長鑒核伏候指令施行謹呈

中華民國二年二月十四日

呈財政總長乞假省親文

附部電

爲呈請給假一月回籍省親事竊鵬雲自束髮受書卽承庭訓以志四方增閱歷效世用爲勗故弱冠以後出門求師肄業鄂垣經心兩湖自強各校舍者凡十二年然爾時雖頻年旅食猶得比歲一歸省不覺離親之苦也自癸卯迄今供職京曹修業進士館者三年留學日本者三年回國以後監理吉江兩省財政者又三年去年復奉命監督虎關稅務十年之間奔走不暇未及一返里門二老白頭衰年多病倚閭望切屢書促歸祇以服務公家未敢擅離職守近復辱被任命承乏吉林若抵任以後事務較繁更無餘閒歸省親舍茲趁虎關交卸之日懇請給假一月暫回潛江原籍省視老親鵬雲身本獨子十年未歸老親望眼欲穿此請實出於萬不得已務懇總長批准俾天涯遊子得覲衰顏實爲德便謹呈

中華民國二年二月二十日

三月三日奉財政部來電殺虎口甘監督鑒呈悉擬請給假一月回籍省親應照准財政部勘印

咨山西民政長論薩拉齊縣財政公所不應干涉國家稅文

爲咨明事據西包鎮分局呈稱准薩拉齊縣臨時清查財政公所知會內開中華民國元年六月二十五日准本縣知事照會內開中華民國元年六月二十日奉民政長周行頒發省議會議決各縣清查財政簡章選舉員紳設所調查依限造報隨查簡章第五條載公所有向各衙署局所查閱賬簿文卷之權於查閱後有疑義時有備文質問限日答覆之權如各機關有故爲延宕或有意含混者有直接呈請民政長查辦之權等語查貴局收稅方法報解數目並平餘火耗陋規中飽等弊種種均在調查之列相應備文知會貴局請煩詳細見覆以便填表造報等因該公所是否有干涉國家稅局之權理合備文呈報懇請核示遵行等因前來查本關徵收稅款係屬國家稅性質與地方稅迥別山西省議會議決各縣清查財政簡章乃對地方稅而言非對國家稅而

言該公所併爲一談未免誤會至國家稅徵收機關原隸於中央政府即稅則有應脩改之處必須經由參議院議決施行非地方議會所得參預權限所在本極明晰該縣財政公所未明國家稅與地方稅之性質故辦事不免軼出範圍相應咨明貴民政長希卽轉咨山西臨時省議會知會薩拉齊縣財政公所查照可也此咨

中華民國元年八月二十三日

咨山西陝西都督山西民政長爲開辦稅局請飭各縣知事出示曉諭文

爲咨請事本監督奉大總統命令督稅斯關起程之前疊奉財政部令該關所屬西包頭河保營黃甫川等處商民阻撓稅務應卽嚴行查禁以重國課等因到任以後遴委員司分往各地查照向章設局開徵並咨請查照在案現據各該主任員陸續呈稱各該局卡前因軍務倥傯暫行停辦今復開徵各地商民不無遲疑觀望非得各地方知事出示曉諭則前途阻力必多等情前來查本關稽徵區域沿邊千有餘里非各機關設立完備不足杜偷漏而拓稅源所有暫停西包頭河保營黃甫川各局卡亟應繼續

開辦俾復舊觀惟整頓權政責在本關而維持治安曉諭人民則地方官紳之責現在各該員司到差已久靜候開辦應請貴都督貴民政長迅賜飭行河曲五原薩拉齊府谷各縣知事出示曉諭派差彈壓并會同縣議會實力維持庶免滋生事端有妨權政除分咨外相應咨請貴都督貴民政長迅賜諭飭施行實綢公誼并希見覆無任盼切此咨

中華民國元年九月十八日

咨請山西民政長禁止西包頭商民反抗牲畜稅文

爲咨請事據西包鎮分局主任員魯靖氛呈稱本局專徵牲畜稅約分二種一爲販運售賣之牲畜過關過河照章完稅者是一爲騎馱拉車之牛馬駝隻給予常年稅崇每年換票完稅一次者是歷經辦理在案此間商民初以本局停徵復設意存觀望納稅寥寥繼由薩拉齊縣知事奉到山西民政長公布所有販運售賣之牲畜始行照舊納稅至騎馱拉車之牛馬駝隻每年換票完稅一次者仍復抗不完納其所執理由謂民

政長公布祇有購運貨物照章完稅字樣並無騎馱拉車之牛馬駝隻照章完稅字樣如欲仍照舊章徵收非有民政長布告不可等語主任員學淺才疎膺茲重任誠恐收數短絀責無可逭理合將此間爲難情形呈請鑒核等情前來查殺虎關稅貨以牲畜爲大宗按年收數幾居例定稅額之半故稽查牲畜亦最嚴凡騎馱拉車之牛馬駝隻向例一律完稅以杜影射之端完稅之時例給照票一紙每屆關期另予更換至前清光緒三十四年經林前監督重新釐訂凡騎馱拉車之牛馬駝隻應一年換票完稅一次者均自正月初一日起至十二月底止毋庸以關期任期截算俾免一年兩稅之弊並經附片奏明通飭所轄應征牲稅各局卡一律遵辦在案方今民國初建需欸孔亟所有國家稅則既尙未從新厘訂自應照舊徵收乃包頭商民對於騎馱拉車之牛馬駝隻各稅屢有抗違並置貴民政長之公布於不顧殊屬不知大體况本關所轄局卡凡十七八處辦法均應一律若對於未經反抗之處則仍舊徵收而對於包頭商民則置而不取不特辦法參差亦且不成政體擬請貴民政長頒布示諭二道飭交薩拉齊

縣知事張貼通衢俾商民對於騎馱拉車之牛馬駝隻各稅不得率行抗違實綏公誼相應備文咨請貴民政長查照施行並希見覆此咨

中華民國元年十二月十日

咨陝西都督聲明黃甫川稅局設立年代地點文

爲咨請事據河保營分局主任員兼辦黃甫川分局事務楊洪祖呈稱河保營稅局已於十月九日復行設立照舊開徵業經呈報在案十一月三日主任員馳抵府谷縣與該縣知事商酌開辦黃甫川分局事宜該縣知事深痛民國財政之困難慨允所請至翌日該縣知事以陝西張都督令見示內開殺虎關設卡於陝西地方始於何年設在何地本府無案可稽仰該知事迅速查明呈覆以憑核辦等語主任員到差日淺所有黃甫川設卡年月不得其詳理合呈請監督將黃甫川設卡情形咨明陝西都督俟陝西都督咨覆到日主任員方能馳赴府谷縣麻地溝續籌開辦等因前來查黃甫川稅局之設始於前清康熙十六年初設之時分爲二處一曰城稅局設在黃甫川堡內一

日邊稅局設在邊口麻地溝距黃甫川堡二十里均係陝西府谷縣所屬由黃甫川而西如清水木瓜孤山鎮羌神木各口均係前清時代奉旨嚴禁貨物牲畜私行出入之路隨時由黃甫川稅局派遣員役嚴密巡查歷經辦理在案至前清同治二年前監督俊達因偷漏日多稅款短絀曾有請禁東西邊口私行出入貨物之奏奉有諭旨內稱殺虎口監督俊達奏請嚴禁奸商繞越由地方官協查並禁東西邊口私行出入貨物各一摺殺虎口徵收稅課向以邊牆及黃河爲界商人載運貨物例須直赴殺虎口輸稅不許繞越別路私走至附近黃河之府谷縣地方設有黃甫川稅局凡殺虎口應徵稅貨由黃河順流而下者均應赴黃甫川稅局輸稅後方准入陝其由陸路進口之牲畜貨物如由托克托城赴陝運渡黃河西岸者卽由殺虎口起票赴托克托城木稅局驗票放行近來奸商多由托克托城黃河東岸藉詞西渡偷漏關稅總由地方官不肯協力查拿所致著德勒克多爾濟沈桂芬嚴飭該地方文武協同該監督所派差役實力稽查嚴拿偷漏以重國課毋得視爲具文至山西沿邊各口自殺虎口起東一帶至